



Un mucha muher cu un meta defini:

LAURA PASKEL TA UN MODELO EHEMPLAR PA NOS HUBENTUD ARUBANO!

Di UNESCO pa Hubentud

Interesante ta pa observa con lige nos comunidad Arubano ta orienta y dirigi su atencion y admiracion riba personahenan femenino cu ta sobresali internacionalmente na ocasion di e celebracion di Dia Internacional di Hende Muher.

Si nos mester puntra nos hobennan pa menciona nomber di muhernan cu nan conoce, kendenan a destaca den e ultimo decadanan, sigur lo tin un lista di nomber tanto di e mundo politico como den farandula, cu lo worde menciona pero

lamentablemente mayoria di e personanan cu lo worde menciona lo ta muhernan di otro paisnan grandi y no ta hende muher di e pida baranca Aruba mes. Nos hobennan no tin e culpa di esaki, pero nos como mayornan of educadornan tin e deber di señala personanan cu a contribui na un forma positivo na e adelanto di nos comunidad na nos yiunan.

Ta pesey UNESCO, den cuadro di concientizacion kier a presenta den e Seccion Hubentud den Movecion, awe, e persona di Laura

Wernet- Paskel, kende por worde considera como un modelo pa nos mucha muhernan hoben, pa motibo di su conviccion y pensamiento critico cu e tabata tin desde un edad hopi hoben.

Laura Paskel a nace dia 18 di Februari 1911 y ta bini di un famia humilde di e distrito di Santa Cruz. Apesar di e varios limitacionnan cu un famia Arubano tabata tin y e poco recursonan cu Aruba tabata dispone di dje, den e temponan aya, nos pro conclui cu e biografia di Laura cu e si tabata tin un aspiracion cu a sa di kibra tur obstaculo, y na un edad masha hoben mes (15 aña) a dicidi di kier sigui su estudio como educador pa asina por regresa y contribui lo maximo den e adelanto di su isla natal y habitantenan.

Despues di exitosamente a termina su estudio na "R. K. B i j z o n d e r e Kweekschool voor Onderwijzeressen" na Reuver, Hulanda, dia 1 di September di 1931 Laura Simona Paskel a ricibi su prome nombramento como maestra di school na Aruba, for di Obispado di Willemstad.

Su prome experiencia tabata na Maria School, na Santa Cruz, y desde e tempo ey el a bira conoci como "Juffrouw Laura". Su personalidad como educador hoben (20 aña) tabata uno masha sobresaliente.



Laura Paskel

Fuera di su trabaonan como maestra di school el a dedica parti di su bida na actividadnan social, specialmente pa e comunidad di Santa Cruz y gran parti tambe el a dedica na e bida religioso catolico.

Como educador e tabata semper preocupa pa su alumnonan y e pueblo en general, ta pesey el a habri un biblioteca na su cas, na unda alumno, soer, y padernan y e pueblo en gen-

eral tabata haci uso di e bukinan.

Ta di admira e hecho cu Juffrouw Laura tambe tabata un escritor di cual awe nos tin e buki titula "Ons Eilandje Aruba", cu ta basa riba n o s a p a r t i d a p r o m e cu Lago y despues.

For di "Ons Eilandje Aruba" nos por aprecia e pensamiento critico di Laura con e escritor a tene cuenta riba cada detaye di e desaroyo di su pais tanto aspectonan negativo como esnan positivo.

Na aña 1962 Laura Wernet-Paskel a fayece den Lago Hospital. Na bida Juffrouw Laura tabata casa cu Willem Wernet, y mama di 7 yiu.


UNESCO TA INFORMA DEN SECCION PA HUBENTUD

Entrante awe Oficina di UNESCO Aruba ta cuminsa cu un espacio special den e Seccion Hubentud den Movecion di Matutino DIARIO. E meta di e publicacionnan di UNESCO ta pa yuda amplia e conocimiento general di nos lectornan (hoben y adulto) door di brinda articulonan informativo y educativo riba temanan manera e.o.: enseñanza, cultura, historia, ciencia, tecnologia moderno, medio ambiente, etc.


UNESCO ta considera di suma importancia pa nos hobennan por ricibi mas tanto informacion posible pa enriquece nan conocimiento, y medianan di comunicacion ta hunga un rol masha particular den esaki.

Nos hobennan mester worde motiva tanto na cas como na schoolnan pa lesa mas tanto articulonan riba temanan di interes nacional, pero tambe internacional, pa asina nan por cuminsa custumbra analiza y forma opinion critico pa nan mes.

Nos ta spera cu nos contribucion lo ta uno p positivo na e adelanto di futuro generacionnan.



**PA GENERACION
DI
FUTURO**



Just landed Cars Jeans
and Jump Suits

PRO FASHION

The Mainstreet Fashion House